

Na osnovu člana 58. stav 3. Zakona o lovstvu ("Službene novine Federacije BiH", broj 4/06), federalni ministar poljoprivrede, vodoprivrede i šumarstva donosi

PRAVILNIK

O VRSTI I BROJU PASA ZA LOV NA POJEDINE VRSTE DIVLJAČI U ODREĐENIM PODRUČJIMA

I. OPĆE ODREDBE

Član 1.

Ovim Pravilnikom se propisuju vrste i broj čistokrvnih lovačkih pasa sa položenim ispitom urođenih osobina za lov na pojedine vrste divljači u određenim područjima.

II. LOVAČKI PSI

Član 2.

Čistokrvni lovački psi u smislu ovog Pravilnika jesu svi psi koji udovoljavaju potrebama za lov i posjeduju zvanični Rodovnik izdan od jedne od članica Međunarodne kinološke federacije (FCI).

Rodovnike za pse u Federaciji Bosne i Hercegovine (u daljnjem tekstu: Federacija) izdaju kinološki savezi - kao ovlašćeni članovi Međunarodne kinološke federacije (FCI), na osnovu zvaničnih podataka o porijeklu pasa, a dopunjavaju ih na osnovu pozitivne ocjene dobijene na zvanično organizovanoj smotri ili izložbi za ocjenu oblika (eksterijeru) pasa i pozitivne ocjene na organizovanom ispitu urođenih osobina pojedinih pasmina pasa.

Član 3.

U lovu se mogu upotrebljavati lovački psi koji su registrovani kod kinoloških saveza u Federaciji i imaju pozitivnu ocjenu sa Smotre za ocjenu oblika i položen Ispit urođenih osobina po pravilnicima kinoloških saveza.

Izuzetno od odredbe stava 1. ovog člana, radi uvježbavanja za obavljanje određenih radnji u lovu, mladi lovački psi mogu sudjelovati u lovu i bez položenog ispita prirođenih osobina, do navršenih 18 mjeseci života.

III. VRSTE PASA

Član 4.

Pasmine lovačkih pasa u smislu ovoga Pravilnika koje se najčešće upotrebljavaju u Federaciji razvrstavaju se po grupama:

- *terijeri*: njemački lovni terijer, foksterijer kratkodlaki i foksterijer oštrodlaki;
- *jazavčari*: jazavčar kratkodlaki, jazavčar oštrodlaki, jazavčar dugodlaki i jazavčar kuničar;
- *goniči*: istarski kratkodlaki gonič, istarski oštrodlaki gonič, posavski gonič, dalmatinski pas, bosanski oštrodlaki gonič (barak), srpski gonič, trobojni srpski gonič, planinski crnogorski gonič, slovački gonič (Kopov), tirolski gonič, alpski brak-jazavčar, bigl i baset;

- *krvosljednici*: bavarski i hanoverski;
- *ptičari*: njemački ptičar kratkodlaki, njemački ptičar oštrodlaki, njemački ptičar dugodlaki, pudlpointer, vajmarski ptičar, talijanski ptičar kratkodlaki, talijanski ptičar oštrodlaki (spinon), mađarska vižla kratkodlaka, mađarska vižla oštrodlaka, mali minsterlander, veliki minsterlander, epanjel breton, kortalsov grifon, češki fousek, pointer, engleski seter, gordon seter i irski seter,
- *donosači divljači*: labradorski retriever, zlatni retriever, retriever ravne dlake i retriever kovrčave dlake;
- *dizači divljači*: engleski koker španijel, engleski špringer španijel, velški špringer španijel, klamber španijel i njemački prepeličar.

Član 5.

Ako se u Federaciji upotrebljavaju u lovu pasmine lovačkih pasa koje nisu navedene u članu 4. ovog Pravilnika, smatrat će se lovačkim psima ako posjeduju dokument da su kao takvi evidentirani kod jedne od članica Međunarodne kinološke federacije.

Član 6.

Strani državljani u lovu mogu koristiti lovačke pse registrirane u zemljama iz kojih dolaze a imaju dokaze da su položili ispit u radu - prema propisima Međunarodne kinološke federacije - FCI.

IV. BROJ LOVAČKIH PASA ZA LOV DIVLJAČI

Član 7.

Korisnik lovišta, pravno ili fizičko lice kojem je povjereno pravo korištenja lovišta (u daljem tekstu: korisnik) je obavezano da u lovištu kojim gospodari obezbijedi lov sa psima u skladu s odredbama ovog Pravilnika.

Član 8.

Lov sitne divljači čije tehnike lova zahtijevaju lovačkog psa ne može se započeti i obavljati bez psa u skladu sa čl. 2. i 3. ovog Pravilnika.

Skupni lov divljači čije tehnike lova zahtijevaju lovačkog psa ne može se započeti i obavljati ako u njemu ne sudjeluje najmanje jedan lovački pas na pet sudionika.

Član 9.

Korisnik lovišta je obavezan da u lovištu kojim gospodari, a u kojem se prema odredbama lovnogospodarske osnove ili programa uzgoja divljači, planira odstrjel krupne divljači, osigurati lovačkog psa koji ima položen radni ispit na krvnom tragu.

V. UPOTREBA PASA

Član 10.

Sitna se divljač lovi lovačkim psima ptičarima, dizačima i donosačima divljači, terijerima i jazavčarima koji imaju položen ispit urođenih osobina.

Lovačkim psima iz člana 4., al. 1.,2.,3. i 4., ovog Pravilnika s položenim ispitom urođenih osobina dopušteno je loviti divlju svinju.

Lovačkim psima goničima s položenim ispitom urođenih osobina dopušteno je loviti divlju svinju, zeca, divljeg kunića, lisicu, čaglja, divlju mačku, kune i tvora.

Terijerima i jazavčarima s položenim ispitom prirođenih osobina dopušten je lov jamarenjem uz iskapanje.

Član 11.

Nije dopušteno upotrebljavati lovačke pse noću, osim kod rada na krvnom tragu, i lova šljuka i močvarica na preletu. Kao noćno vrijeme drži se razdoblje od dva sata nakon zalaska sunca do dva sata prije izlaska sunca.

Član 12.

Korisnik lovišta utvrđuje mogućnost korištenja vrsta lovačkih pasa kao i vrijeme njihove upotrebe u lovištu.

Lovački psi goniči mogu se upotrebljavati u lovištu samo nakon dobivene dozvole korisnika lovišta.

Sa goničima nije dopušteno loviti od 5. januara do 1. oktobra.

Član 13.

U svakom lovu, pojedinačnom ili skupnom, u kojem je propisana upotreba lovačkih pasa u skladu sa Zakonom o lovstvu, moraju biti osigurane pasmine i broj pasa prema odredbama ovog Pravilnika.

Lice koje rukovodi lovom (lovnik) dužno je odmah otkazati lov, odustati od njega, odnosno prekinuti ga ako se lov ne odvija u skladu sa uvjetima iz ovog Pravilnika.

Lovni inspektor, stručno lice za provedbu lovnogospodarske osnove, lovnik i lovočuvar dužni su nadzirati pravilno provođenje lova u skladu sa Zakonom o lovstvu, te sprječavati svaki lov ako nije provoden prema uvjetima iz ovog Pravilnika.

Vlasnik i vodič lovačkog psa dužni su na zahtjev lica iz stava 3. ovog člana predložiti sve potrebne dokaze za postojanje uvjeta iz člana 2. ovog Pravilnika.

VI. ISPIT UROĐENIH OSOBINA I RADNI ISPIT

Član 14.

Ispit urođenih osobina kao i ispit u radu na krvnom tragu za lovačke pse polaže se na osnovu pravilnika kinoloških saveza, u skladu s propisima Međunarodne kinološke federacije.

Član 15.

Na osnovu položenog ispita (ispit urođenih osobina, ispit u radu na krvnom tragu) lovačkog psa izdaju se uvjerenja u skladu sa propisima Međunarodne kinološke federacije.

Uvjerenje iz stava 1. ovog člana izdaju Kinološki savezi Federacije BiH.

O izdanim uvjerenjima iz stava 2. ovog člana evidenciju vode kinološki savezi razvrstano po grupama iz člana 4. ovog Pravilnika.

Član 16.

Lovačkim psima koji su položili ispit prirođenih osobina i/ili radni ispit, u skladu sa propisima Međunarodne kinološke federacije -FCI. Kinološki savezi će na zahtjev vlasnika psa nostrificirati uvjerenje o položenom ispitu urođenih osobina i/ili radnom ispitu u skladu sa odredbama ovog Pravilnika.

VII. ZAVRŠNE ODREDBE

Član 17.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".

Broj 06-02-283-7/07
januara, 2008. godine
Sarajevo

Ministar
mr. sci. **Damir Ljubić**, s. r.
